


FÓRAM AN TIONSCNAMH EORPACH Ó NA SAORÁNAIGH

Conas comhpháirtithe a aimsiú:
leideanna praiticiúla



LEARN - DISCUSS - CONNECT - SEEK ADVICE

Rannpháirtíocht na saoránach i mbeartas an Aontais Eorpaigh a chothú

Tá an ceart ag saoránaigh den Aontas a bheith rannpháirteach i saol daonlathach an Aontais Eorpaigh. Tá go leor bealaí ann inar féidir le muintir na hEorpa an ceart seo a chleachtadh (e.g. achainí a chur faoi bhráid Pharlaimint na hEorpa, páirt a ghlacadh i gcomhairliúcháin phoiblí, teagmháil a dhéanamh leis an Ombudsman Eorpach, etc.). Mar sin féin, is uirlis ar leith é an Tionscnamh Eorpach ó na Saoránaigh (TES) atá ar fáil do shaoránaigh chun tionchar a bheith acu ar chlár oibre an Aontais Eorpaigh.

Má éiríonn le saoránaigh, iad ina ngrúpa d'eagraithe, 1 mhilliún síniú a bhailiú, agus na tairseacha íosta is gá a bhaint amach in aon cheathrú ar a laghad de na Ballstáit (mar atá 7 gcinn faoi láthair) laistigh de 12 mhí, féadfaidh siad iarraidh ar an gCoimisiún Eorpach, faoi chuimsiú a chumhachtaí (féach an nóta treorach Conas tionscnamh a dhréachtú), reachtaíocht a mholadh chun na Conarthaí a chur chun feidhme.

Tá leideanna praiticiúla agus acmhainní úsáideacha sa nóta treorach seo chun cabhrú le heagraithe teacht ar na comhpháirtithe cearta agus comhghuaillíochtaí láidre rathúla a fhorbairt. Chun tuilleadh sonraí a fháil faoi nós imeachta TES, féach An Tionscnamh Eorpach ó na Saoránaigh – Na bunghnéithe. Chun tuilleadh eolais a fháil faoin bhfeachtas, féach an nóta treorach Conas dul i mbun feachtais agus Conas d'fhoireann le haghaidh tionscnamh Eorpach ó na saoránaigh a struchtúrú.

Nod ó na heagraithe

D'éirigh leis an tionscnamh *Cuirtear deireadh leis an mBeodhioscadh* breis agus 1 mhilliún síniú a bhailiú a bhui le tacaíocht ó mhórghrúpa uile-Aontais ina raibh breis agus 250 grúpa cosanta ainmhithe, eagraíochtaí eolaíochta agus cuideachtaí a dhíolann táirgí 'neamhchruálacha ar ainmhithe'.

An grúpa d'eagraithe

Ní mór seachtar saoránach Eorpach ar a laghad a bheith sa ghrúpa d'eagraithe, iad sean go leor le vóta a chaitheamh i dtoghcháin Pharlaimint na hEorpa, agus cónaí orthu i seacht mBallstát éagsúla ar a laghad. Tá tábhacht le saoránacht den Aontas (gan beann ar an mBallstát) agus le háit

chónaithe araon chun an ceanglas sin a chomhlíonadh.

LEID

Bain úsáid as rannóg phobal TES ar Fhóram an Tionscnamh Eorpach ó na Saoránaigh. Roghnaigh daoine iontaofa a bhfuil taithí acu le bheith ina mbaill den ghrúpa d'eagraithe. Bain úsáid as na heagraíochtaí comhpháirtíochta atá agat chun teacht ar na hurlabhraithe is fearr don tionscnamh.

Ainmneofar teagmhálaithe – ionadaí amháin agus ionadaí malartach amháin – chun labhairt leis an gCoimisiún thar ceann an choiste agus chun gníomhú ar a shon. Féadfaidh an grúpa d'eagraithe beirt eile a ainmniú a ghníomhóidh ar son an teagmhálaí sa chás nach bhfuil fáil air. Is féidir eintiteas dlíthiúil a chruthú chomh maith a dhéanfaidh ionadaíocht ar an ngrúpa d'eagraithe, rud a chuirfidh le hinfheictheacht an tionscnaimh. Ní mór an t-eintiteas dlíthiúil seo a chruthú i gcomhréir le rialacha Ballstáit, áfach. An dúshlán a bheidh i gceist ansin foirm dlí agus reachtaíocht na tíre is oiriúnaí maidir le riachtanais an tionscnaimh agus an ghrúpa d'eagraithe a roghnú.

LEID

Aimsigh comhpháirtithe sula seolfaidh tú do thionscnamh! Beidh an feachtas ar an mbóthar ceart má tá do chomhpháirtithe **líonmhar**, **éagsúil**, **réamhghníomhach** agus **scaipthe ar fud an Aontais**.

Comhpháirtithe chun tacú leis an ngrúpa d'eagraithe agus leis an bhfeachtas

Is iad comhpháirtithe an tionscnaimh na daoine aonair agus na heagraíochtaí éagsúla a dhéanfaidh do chuid teachtaireachtaí a leathnú agus a mhéadú chun cabhrú leat feachtas faoin bhfeachtas a ardú agus daoine a spreagadh ráitis tacaíochta a shíniú.

Cé go mbeidh dlúthnaisc cheana féin ag na heagraithe le roinnt acu, beidh gá le cinn eile a earcú. Chuige sin, ba cheart don ghrúpa d'eagraithe liosta cuimsitheach a thiomsú de na tacadóirí féideartha ar an leibhéal áitiúil, réigiúnach, náisiúnta agus Eorpach sna catagóirí seo a leanas:

- **idirghabhálaithe** – eagraíochtaí ballraíochta a bhfuil bá acu le hábhar an tionscnaimh amhail ceardchumann, ENRanna, comhlachais, etc.;
- **urraí** – seans go mbeidh roinnt idirghabhálaithe toilteanach tacú leis an bhfeachtas (trí chistí nó trí thacaíocht comhchineáil a thabhairt). B'fhéidir gurbh fhiú duit freisin do mhachnamh a dhéanamh ar iarratas a chur chuig na fondúireachtaí carthanachta ábhartha;
- **tionchairí** – má tá polaiteoirí, iriseoirí agus daoine mór le rá toilteanach tacaíocht a thabhairt do do thionscnamh, is féidir go gcabhróidh sin chun borradh a chur faoin mbailiú sínithe agus an scéala faoin tionscnamh a scaipeadh i measc an phobail ag an am céanna;
- **oibrithe deonacha** – na pobail ar líne a leanann eagraithe agus eagraíochtaí comhpháirteacha nó a úsáideann haischlibeanna a bhaineann le hábhar, is foinse thábhachtach iad chun teacht ar oibrithe deonacha atá sásta teachtaireachtaí an fheachtais a thabhairt leo chuig na pobail sin, ar líne agus as líne araon, agus chun sínithe a bhailiú.

LEID

Seo thíos roinnt de na céimeanna is ceart duit a leanúint agus tú ag dul i dteagmháil le comhpháirtí féideartha:

1. Cuardaigh eagraíochtaí i mBallstáit eile a bhfuil na spéiseanna céanna acu agus atá agatsa.
2. Eagraigh cruinniú/glaoch chomh luath agus is féidir.
3. Mínigh do thionscnamh, an dóigh a bhféadfaidh an comhpháirtí féideartha cur leis, agus an tairbhe a d'fhéadfadh a bheith ann don eagraíocht sin. Cabhróidh sé sin chun cur ina luí ar an gcomhpháirtí féideartha a bheith páirteach agus gníomhach sa tionscnamh.
4. Má tá na comhpháirtithe féideartha toilteanach tacú le do thionscnamh, ní mór na ról a bhaineann leis a shainiú go soiléir agus an méid a bhfuil tú ag súil leis a chur in iúl.
5. Mura bhfuil siad toilteanach cuidiú, iarr orthu daoine nó eagraíochtaí eile a mholadh a bhféadfaidh suim a bheith acu ann.

Nod ó na heagraithe

Thug an Pápa Proinsias agus an Pápa Beinidict XVI araon tacaíocht phoiblí don tionscnamh *Uno di noi* ('Duine dínne'), rud a d'fhág go raibh sé an-fheiceálach agus rud a thug creidiúnacht shuntasach dó.

LEID

- Iarr litreacha foirmiúla tacaíochta ar an líon comhpháirtithe is mó is féidir. Le chéile, cruthóidh siad éiceachóras chun teachtaireachtaí an fheachtais a chomhroinnt agus a scaipeadh.
- Is minic a bhíonn acmhainní sách maith ag ENRanna agus comhlachais Eorpacha, agus bíonn córais agus líonraí cumarsáide dea-fhorbartha acu. Bain leas astu!
- Bíonn líonraí maithe ag Feisirí Pharlaimint na hEorpa sa Bhruiséil agus seans go gcabhróidh siad chun doirse a oscailt duit. Téigh i dteagmháil leo!
- Bain úsáid as na líonraí teagmhálaithe atá agat féin mar bhealach breise chun comhpháirtithe a aimsiú: do theaghlach, cairde, lucht aitheantais, comharsana, comhghleacaithe san obair, ar scoil nó ar an ollscoil.
- Trí úsáid ghníomhach a bhaint as na meáin shóisialta (Twitter, Facebook, Instagram, LinkedIn, etc.), d'fhéadfadh i bhfad níos mó deiseanna a bheith agat chun teagmháil a dhéanamh le comhpháirtithe féideartha.
- Díriú an feachtas ar thíortha ina bhfuil eolas maith ag na saoránaigh ar ábhar an tionscnaimh cheana féin.
- Beidh cúiseanna éagsúla ag na comhpháirtithe chun tacaíocht a thabhairt don tionscnamh, mar sin déan a chinntiú go bhfuil leas i gcoiteann acu go léir: go mbeidh rath ar do thionscnamh!

Nod ó na heagraithe

Tar éis an tionscnaimh *Right2Water* a bheith mínithe i sceitse a craoladh mar chuid de chlár príomh-ama sa Ghearmáin, bailíodh thart ar 200,000 síniú sna laethanta ina dhiaidh!

Foinsí eile chun comhpháirtithe a lorg

Clár Trédhearcachta an Aontais Eorpaigh

Is clár deonach é an Clár Trédhearcachta a chlúdaíonn eagraíochtaí a dhéanann iarracht tionchar a imirt ar cheapadh beartas an Aontais agus ar institiúidí an Aontais.

Is féidir teacht ar eagraíochtaí de gach cineál sa bhunachar sonraí seo, cuir i gcás gnólachtaí príobháideacha, comhlachais tionscail, seirbhísí comhairleachta agus ENRanna, gníomhaireachtaí, meithleacha machnaimh, institiúidí taighde agus acadúla, agus bardais. Tá thart ar 12,000 cláraí ann a bhfuil eolas curtha ar fáil acu a bhaineann lena suíomhanna gréasáin, sonraí teagmhála, spriocanna, gníomhaíochtaí sonracha, baill foirne, buiséad agus réimsí spéiseanna.

Is féidir cuardach ginearálta a dhéanamh ach eochairfhocail amhail ‘comhshaol’, ‘cosaint sonraí’, ‘trádáil’, ‘tomhaltóirí’, ‘óige’, ‘iompar’ nó ‘cánachas’ a chur isteach. Is féidir cuardach níos mionsonraithe a dhéanamh sa chluaisín ‘Sainchuardach’. Ón mbarr anuas, na catagóirí cuardaigh ná rannóg nó cineál eagraíochta, ansin suíomh, leibhéal spéise (Eorpach, domhanda, náisiúnta, réigiúnach nó áitiúil), réimsí spéiseanna, etc.

LEID

Suíomhanna gréasáin úsáideacha eile chun comhpháirtithe a aimsiú:

Ideal-ist Partner Search, ar líonra idirnáisiúnta TFC é.

Do chomhpháirtithe a choinneáil spreagtha agus páirteach

Agus líon mór comhpháirtithe bailithe le chéile agat, ba cheart duit na dálaí cuí a chruthú chun go bhféadfaidh sibh oibriú le chéile agus chun go mbeidh do chomhpháirtithe spreagtha i rith an fheachtais. Chuige sin, ba cheart duit:

- Tacar coiteann luachanna a chruthú chun dul i bhfeidhm ar shaoránaigh;
- Cuspóirí atá soiléir agus réalaíoch a leagan síos agus spriocanna do gach uile chomhpháirtí a shainiú i rith an fheachtais;
- Meon pobail a spreagadh trí chruinnithe rialta a eagrú ar líne agus, más féidir, cruinnithe duine le duine a eagrú;

- Coinnigh do chomhpháirtithe ar an eolas faoin dul chun cinn atá á dhéanamh agus cuir aiseolas dearfach ar fáil nuair a bhaintear cuspóirí amach d'fhonn ardmheanma a choinneáil.

Nod ó na heagraithe

Chuir eagraithe an tionscnaimh *‘Deireadh leis an nGhlofosáit’* liosta le chéile de na heagraíochtaí náisiúnta a bhí toilteanach páirt a ghlacadh san fheachtas agus d'oibrigh siad ar bhonn aonair leo.

LEID

Chun tuilleadh sonraí a fháil faoi na bealaí a d'úsáid na tionscnaimh ar éirigh leo chun comhpháirtithe a aimsiú, féach na Scéalta ratha ar Fhóram an Tionscnaimh Eorpaigh ó na Saoránaigh.